



KEMENTERIAN PEMBANGUNAN WANITA,
KELUARGA DAN MASYARAKAT

SIARAN MEDIA

PERSIDANGAN KERJA SOSIAL KEBANGSAAN KALI KEDUA, KPWKM KOMITED WUJUD EKOSOSIAL SEIMBANG

KUALA LUMPUR, 13 September 2023 – Kementerian Pembangunan Wanita, Keluarga dan Masyarakat (KPWKM) melalui Institut Sosial Malaysia (ISM) menganjurkan Persidangan Kerja Sosial Kebangsaan Kali Kedua (PESAN 2) kerjasama dengan Universiti Utara Malaysia (UUM). Persidangan yang bertemakan “Kerja Sosial Mendepani Dunia Ekososial Baharu” telah dirasmikan oleh Yang Berhormat Hajah Aiman Athirah Sabu, Timbalan Menteri Pembangunan Wanita, Keluarga dan Masyarakat (KPWKM) yang berlangsung pada 13 dan 14 September 2023 bertempat di Dewan Intelek, ISM, Kuala Lumpur.

Tema persidangan kali ini, fokus kepada peranan signifikan pekerja sosial sebagai agen dalam mewujudkan ekososial yang seimbang bagi membantu meningkatkan kefungsiian dan kesejahteraan sosial khususnya kepada kumpulan sasar KPWKM. Tema ini dipilih bagi memastikan tiada yang tertinggal dari mencapai kesejahteraan sosial menerusi pembentukan ekososial baharu dunia merangkumi pembangunan sosial, ekonomi, politik, budaya, teknologi dan alam sekitar yang seimbang dan saling melengkapi.

KPWKM komited memperkasakan profesion kerja sosial dan latihan kompetensi kerja sosial di Malaysia. Empat daripada enam inisiatif penting dalam profesion kerja sosial yang telah dilaksanakan oleh KPWKM adalah pewujudan piawaian kompetensi kebangsaan praktis kerja sosial, penyeragaman kurikulum kerja sosial, penawaran kursus kerja sosial peringkat sijil dan diploma serta pengambilan pekerja sosial dalam perkhidmatan awam.

Komitmen Malaysia terhadap profesion kerja sosial ini tidak terhad kepada peringkat nasional, turut terlibat secara aktif dalam ASEAN *Social Work Consortium* (ASWC). Malaysia diberi mandat dan kepercayaan dalam latihan bidang kerja sosial dari anggota negara ASEAN menerusi pelantikan dan pengiktirafan Jabatan Kebajikan Masyarakat (JKM) sebagai Ahli Lembaga Pengurus ASEAN *Social Training Centre for Social Work and Social Welfare* (ATCSW). ATCSW merupakan pusat kecemerlangan pekerja sosial di peringkat ASEAN yang menawarkan kursus, latihan, pertukaran kemahiran dan kolaborasi di peringkat ASEAN.

Institut Sosial Malaysia (ISM) satu-satunya pusat latihan dalam kerja sosial di negara ini menyumbang usaha ke arah menyediakan pekerja sosial dan pengamal sosial yang profesional melalui aspek latihan. ISM menawarkan 40 jenis kursus jangka pendek dan sederhana dalam bidang kerja sosial sejak ditubuhkan pada tahun 2002. ISM dengan kerjasama Universiti Utara Malaysia (UUM) akan melaksanakan Sijil Profesional Asas Kerja Sosial (SPAKS) untuk pekerja sosial di bawah KPWKM bermula tahun 2023.

Turut hadir dalam program ini, YBhg. Datuk Dr. Maziah Che Yusoff, Ketua Setiausaha KPWKM, YBhg. Prof Dr. Mohd Fo'ad Sakdan, Naib Canselor UUM, YBr. Dr. Faridah binti Awang, Pengarah ISM serta pegawai-pegawai kanan Kementerian.

###

**UNIT KOMUNIKASI KORPORAT
KEMENTERIAN PEMBANGUNAN WANITA, KELUARGA DAN MASYARAKAT
13 SEPTEMBER 2023**